

2 Timoti

Polva Timotimba Omnana, Kamba Doa Murapeta Dahalm Vev, Hona Andrava Si Kava Yena Englisra Holothovav.

1 ¹⁻²Kava Pol, kava hona tombaimomba novel vipipramnav yem Timotim, kava yemba mindnam und vev, kavna ombolnonoamsna. Sesoa kamba hev puvundthoana Yesus Kristusna moalamangnindrielm. Sesoava kamba puvundthoanamba, wo himba kamba omnana, yea moaoa wulluhungu vinvm hindm hindm, nemelwevsanam alm. Wo nonamba himba si Yesus Kristusna nemeltindilmba avrava, himba si nemelundna Yesus Kristusnana avav. Sesoava ovlahinv hembra os. Sesoa ara, eva Yesus Kristus yemba undalm evevra, eva beswonam wavra evevhomnavra, wo yimba beswonam undwonam noinda avav.

Polva Suwenamendna Ovrevna Timotim.

³Kava kavna sembayingdava yemba putpialohvmoa owaimomolva sia okomba. Wo kav vev, omnav Sesoam, yimba lehra venav hembra, hona sembayingdava. Himba Sesoa kana simbehumunna eindhumunna sembayang vinivna hembra. Wo eva osoa kava hem andra venavta, kav nom nonglavm, os ov, memba lehra. ⁴Kava os nengawov, yimba wenamba kainda avna. Wo kava nengv mindnam hevm os i, yemba nonglalmba, wo osva kava indk vethavav. ⁵Kava yena undmba tanam nengmanav. Nomba sna undva, seilva yena ongapevna Loisna lohna, eva pevna avapevna Yunisna. Wo os kava nengv, yimba nona sna undnamba lohv.

⁶Memba honamba kava hengava yenamba nengavnangmba owilihaphovpa, nonam andra velm, andra noi ten Sesoa pevm vraohnam. Sesoa

yemba vraohna nomba andrava, nonamba kava englava kavnamba holowohavnamba yeindava. Doa taiha vevra, os ora, suwemda tavrakilihavongo vev. ⁷Sesoava pimba hevsongolkoklava daswolnamos, osmba noinda pem vivra. Himba pimba daswolna hevsongolnana, wo pimba noinda nonapopolva av keknamba, wo pimba indhanamba monglamba und vewol viv, wo pimba pivmamba eukho vevra.

⁸Wo noinda osva manam yimba lousva vevra, ishunilmba indhanamba pivna mendekli Yesus Kristusmomba. Wo eva manam yimba kanapenamba lousva vevra. Tanam kava buinindrini mendeklina. Heva os hona kinmba kava vrav, hena besal nemelmonana. Wo noinda osva yeoa kam pethamno, honam kinm vralm, manara, Sesoava pimba suwenanovnamangas loihanga towandmangas wolana, honamba velmba. ⁹Sesoava pimba lopshanamba, hevtindilm kekaiv vena. Memba noindava owai, manimani memba pimba pivpa vivpa, heva os noinda nom, hev ten nengvm, eva noinda hev ten pim undalm vewol vena. Nomba hevna undva pimba temba nonamba daswolnamba Yesus Kristusnanamba, nonamba manimani suvevnamoa mendah. ¹⁰Wo simba pivna mendekli Kristus Yesus prunna, wo noinda osva, mani eva pimba shaluhunna, novnamba nonglalmba Sesoana undmba. Yesus Kristusva suwemsna muengna pina dalalmba. Manara noinda, pimba si dalvrava, henga phosohvra. Wo besal nemelmonana himba pimba novpa wuleihiv monamba, no undnam alm, osm owai, es eva mueisowa vevav.

¹¹Kamba doa kikih vrena, ishomana vinilm nomba besal nemelmomba, eva moalamangnindrinielm guruwolm. ¹²Wo doa daipotava kava kinwondava ilohv, noinda kava ishunvm besal nemelmom. Heva os kava lou vevmoa. Kava louhui, manara, kava wiyera lohmanav Yesusmba, hembra kava keknamba undnahonamba lohmanavpa. Wo vei, os kava nengv, himba si kekalvho vewol vevra nomba manimani, himba temba kaindava slowothonamba, heva verava, no nambai phora.

¹³Keknam wohengvm moanonoam, pev ten hellevnam kanamini. Engvm, osm ovra, os avm, pioa undnahonam keknam hemoa amnavra, indhanam monglam nesmos vewol vivra, men piv avm Yesus Kristusinda. ¹⁴Yeo dandana vrevm moanonoam, nomoa temba kava yemba ishomnanamba. Dandana vrevm Sesoasongolnapopol, henoi ten eungu vinvm pivinda.

¹⁵Yimba nonora lohv, osva doa doara kamba dasvo buona Asiapethanindva, eva hona tendorinisambla Pikelusi Hermokenesi. ¹⁶Kava sembayang vev, osm mendekliva si wavra vrowol vevra Onesiporus tatanamba. Himba elsus kamba kolvralohvna, himba louva velohvnamoa, osva kamba omnavna, buimera av, owai. ¹⁷Himba nonamba provnamba Romba, himba kamba keknam silelvna, venamba, kamba nonglana. ¹⁸Kava sembayang vev, osm mendekliva si wolaihavav

Onesiporusmba hevna wavrarava, no nambainamba wetatmorava eksuwulvrava. Yimba nonora lohv, kamba lunit luthuwulana Onesiporusva diva Evesusrava.

Timoti, Yeoa Besal Valgonindrinimsna Loho Yesus Kristusna.

2 ¹Yimba kana ombolnihilnonoamsna lohv. Elsus yeoa wohlohvm Yesus Kristusna wavrakolana. ²Vena, pev eva annind annind doa yimba hillina, nonamba kava numhowol vevnamba. Wo eva yeoa no moana numhowol vevm monglamoia indhanamoia, pev ovra, memba lehra himba honamba lohv. Wo himba eva osva vivrava, owalmba nona eishoraohvra.

³Yeoia keknam monglaoia dawoho hona andraoia, kinmoia gualmoia kamongooia. Wohvevm, os ovra, Yesus Kristusna valgonindrininoia. ⁴Valgonindva viv, osm indk vethara kana kuwuloia honinda, wo noinda osva himba hevna nambaiva pilpiavmoia ombamba, osva temba monglavoia indhanamba vivpa. ⁵Wo eva osta, nomba windetatanonoanindriniva dandwonam alahmana vev, himba temura wohengvra moamba, osmba ka kuvhoawol vera. Owai vellava, si himba owolakohavav, hevna topi moainalmba vralmba. ⁶Wo eva osta, osondranindriniva himba nomba lotholohollava osondrarava, henoisna miva si nevra nomba innemba, temba hevpa wolanamba. ⁷Honamoia keknam nengvm, memba honamba kava ishovpa. Mendekliva si yemba pueuvelavav, keknamba nengalmba, osmba manam manam temuramba levrapivogolmba.

⁸Elsus nengaomanavm Yesus Kristusmoia. Himba lohv Devittindirini. Yesusmba dahanamba boasna, wo himba henga phona pokamariniva. Honamba memba besal nemelmoia honana kava numhowol vev, ⁹wo kava kinm alhv, noinda no besal nemelmora. Eva osva kamba ningivna wenamba kelsombovhonindrinimsnamba. Wo heva os Sesoana moamba wenamba ningilvmoia.

¹⁰Wo ambo heva kava kavmba piapahavra otollinimsna, vralmba kinmba. Kava wohvev honamba, osra nomba Sesoava temba kikih vewol venamba hevtindilm, heoa beswonam ara, nona Yesus Kristusindaoia. Wo himba si avra hemongova beswonamangas yunalm yunalm.

¹¹Moamba memba tanamolnam,

Pimba dalvrava hemongova, wo pivva si osoa henga hemongo aevulvrata mongawulm.

¹²Heva os pimba sambla undnamba amnatava, omnalmba hembra, eva himba si os sambla und verombwolvrata, pimba unilmba.

¹³Pimba keknamba undnahonamba amba owai vetava, himba hevpa si yunalm wohengvra hevna moamba, manara noinda himba hevmba es eva dasalmba weihaloh vrevra.

**Timoti Yeoa Andraoa Keknam Vevm, Sesoana
Andranindrinielm Loholm.**

¹⁴Hona moaoa yunalm osangas wohlotholohvra, wo ongawolv m indhanamo a Sesoana novra, ata alhuv m ombamora homeis. Sna moarava alhollava, nomb a moamba owaimomolmb a mongomba kolvravavmoa, nomb a ambo indkokla vewol vev, nom henoi ten hillivm. ¹⁵Yeo a hev m besal andranindrinielm lohvm, wo nomb a Sesoava vravra, eva pevmoa wohwiraohvm nihnahonam Sesoam. Andranindrini ehlapuvral loho, snal os owai, louva hembra eilh vrevra hevna andrarava. Sna andranindrini loho, noi himba vevrav moanonoava besalmonamangas.

¹⁶Indanam ehalla vinvm nonapenamoa, himba temba ningewol pawolmomba sisia vrvpa. Nomb a sna moamba si indhanamba wonsihavra esvema Sesoaminiva. ¹⁷Nomb a moangakalamomba si pomsna selelevhoangavav, os maim ora, uvavul nihmerini. Himeneusiva Piletusiva sna indhanarinisamb la elohv. ¹⁸Himba moanonoava doa doara pelmai evethana. Himba os ohona, indkumbiva indhanamba doa phosohna pokamariniva, hengava sismba si phosohvavmoa. Wo no samb la indhanamba indkumbina undnahonam keknam almb a paslasal vewol ohovunvna. ¹⁹Wo heva os Sesoana bolvol boalgalva osangas wohlotholohv keknam, wo moamba honamba di noinda novol velohv boalgalsra,

Wo mendekliva nongalv, osva ov, himba nomb a memba kana.

Namba 16:5

Wo eva osoa novol velohvta, indkumbiva nomb a temba osva uvpa, kava keknam amnav mendeklimba, doa heoa wuleihivra sahoklamoa.

²⁰Di mingo deuvmendeklira wo manimani nomb a nalohvpa, hev m nonangas vewol vina golna, silvana. Wo eva monglava nona vewol vina, vena, tina, eva sembpethana. Wo nomb a dumbvpa monglava, heva mana vema mendekli andraramangas, ombandraramba noi mongla dumbv, honi dumbv tina, sembpethana. ²¹Himba nomb a hevmb a posvetava nemelalmb a no monakoklariniva, hembra nomb a si osva moainal mendekli andrarava waisaivvav. Wo himba si dendalva ora lohvra, wo mendekliva si osva hembra ovovravra andraramba. Wo himba si ambo plasra lohvra, besal andramangasm velm.

²²Wo noinda osva yeoa ehalla vevm, no nengavnangkoklanapenamoa, temba vrvpa tendotowondva. Keknam lehvm, honana loholm, beswonam alm, keknam undnahonam loholm, nesmos vewol velm, eva windewonam alm. Honana loho, mongawulm moakot velm hindmongom, nom ten noi he sembayang vinivm mendeklim, mana vema hem sahoklal kethawolhui. ²³Wo manam yimba hillinvra no ningewol pawolmomba. Manara, yimba nonora av, osva sna moakoklarava os ovona, si verava,

mendekli vera daosmolm. ²⁴Mendeklina andranindrini, manam yimba velanongla vewol ovovav. Yea luhunvra besal indhanariniangas indkumbimoa. Yea lohvra besal guruwolmangas. Yea indhanarini windelalm wohlohvm.

²⁵Mendeklina andranindrinoa ambo taivwonam numhowol vevra hemnomoa, temba himba yemongova hona moarava ahnamba lovahwolvpa. Sesoinda ambo temba lohv, heva hev verava, ora weihaloh vewol vinv indm, osm saivra moanonoaram. ²⁶Setan doa engla sheinna hembra, wo newond vewol vena, nom velm manam manam, hev ten nengvm. Wo heva os himba hengava moanonoamba nengvhoallava, himba osva hevmba kilumbshuapravav Setanna newondriniva.

Ovi Pethai Imhara Evhowolvram.

3 ¹Honam nengo os, si indkokla ongolohvav, nonamba ovi pethaiva imhara evhowolvra. ²Wo nonamba indhanamba si hevmangas nesmos avramana vevra, eva dimangas und vivra. Himba si os vivra, vevra, hevmba uvra, kangasta, eva helvatatohluhul avramana vevra netesnalm. Himba si eishunvra monglamba wankenlusmona owalmba. Himba si hilwilvramoa hevna araravalmba. Himba si onengvhunvavmoa hengava nomba indhanamba, temba hembra enesmos vewol vivpa. Wo nomba indhanamba si snamba avramoa, Sesoava hevpa temba nengvpa. ³Himba si owai, avramoa, nesmos vewolalmba monglamba. Himba si sambla und vruwulvra, maisasa vewolalmba owalna indkoklamba, wo si eishovra moakoklana. Himba hevmba si beswonamba naengho vewol vivramoa. Himba si und wohvivra osmangas, eva si ovunvra nomba manam manam besalmba.

⁴Wo oviva pethaiva imhara evhowolvra, indhanamba si nonam emusk vovhoawolvra owalmongova hevmba. Ningvramoa manimani, himba nonamba si os wulluhkaka vevra. Himba si kuvhoawolalmangas vivra, eva netesnalm helvatatohluhulm. Himba si undva vrvira nomangas, ovra, honinda ata kava beswonamba undva lothopravav lehrava. Himba owaimomolva si Sesoamba undva vivramoa. ⁵Himba si os wohvivra, ovra, kava andra viniv Sesoam, heva os owai, himba si tanamba andra vinivramoa Sesoamba. Wo yea indiasvho vinv no indhanaindaoa.

⁶Gurukoklava monglava viv, devvra evongokiluwihinv, wo ungevlim weihaloh vewol viv, osm heoa kamangas patvunvra, honam men ka vivm. Nomba ungevliwa nowolkoklana av, wo himba mendah sikulmonam sahonam av. ⁷Wo heva os nomba ungevliwa himba elsus lehalvohv, nemelmomba hellelmba, wo heva os owai, beswonamba temurava levrapivolvmoa moanonoamba mindnamba. ⁸Hona gurukoklava ovuv moanonoamba, memba honamba os ten Yanesi Yambresi evemnam

Mosesm. Himba temba sna indhana, hena nengavngva sambla lohulinv. Hembra doa nihnahonam wohplel vena, engalmba moanonoamba ⁹Wo heva os si nomba gurukoklamba nonamba kanandhawol vevavmoa, temba hevpa vilangavpa. Wo Kristusnindva indkumbiva si nungeilvav hembra, osva ora, nengavngva henamba indanam puvleinv. Os vinna honamba Yanesimba Yambresimba, Israelnindna novra.

Keknam Wohkek Vetho Sesoana Moamoa.

¹⁰Yimba kamba temura wohlihav, kava sna undnamba. Yimba hellevna, nomba kava numhowol vevnamba, wo eva kava kavpa os avna. Yimba nonora lohv, kava keknam lohmanavna Sesoamba, wo kava kavmba piapahavna, indhanam monglam und vewol vevna. Yimba nonora lohv, kava duuswonamba vevnamoa, nonamba kava kinmba lopsho vrevnamba, wo eva kava kivrawuliha vrevnamoa. ¹¹Yimba nonora lohv, osva kamba vendawuvmona vevna, wo kinmba sna kamba ovongomnavna i. Yimba nonora lohv, honamba kamba di vungamnanam Antiokra, Aikoniamra, eva di Listrara. Yimba nonora, no kembellava kava kinmba sna dombgavna i. Wo heva os mendekli kamba lopslahaomana vevna no kindava. ¹²Tanam, indkumbiva Yesus Kristusindava almba vevrava, osva temba Sesoava nengvpa, hembra si nomba indkokla vewol vivra. ¹³Indhanakokla noi kelsombovhol, eva indhana mongla sahoklal, si hembra wohindkokla vilovav. Himba si wonsaivra monglamba, wo heva os himba si vivra hevnahonam.

¹⁴Heva os yeoa wohkevro keknam moam, nom pev ten numhowol venam. Yimba nonora, honamba moamba memba tanam. Manara, noinda yimba lihawol vev kamba, temba kava yemba numhowol vivnamba. ¹⁵Yimba doa levrapivongona Sesoana doaramini tombaimomba, eusil doara, venamba, daipota. Honamba Sesoana doaramini tombaimomba yemba wulalm vev, osm verava, ambo nongapala vevra nowolla. Wo nomba besal nowolva mona vuenghav, osm Sesoava yemba lopshav monakoklariniva Yesus Kristusnana.

¹⁶Memba honamba tombaimomba doaraminiva, Sesoasongol hev daswolvna, wo hevm mendekli, eva hehuiva es vivav. Vev, nonam numhowolalm moanonoanam, eva ishunilm indhanam, osm ovra, noi indkokla vewol viv yimba. Sesoamomba mendekli, osm oi, wulgupuv vrei sahonamba, nona sishona vriv, wo eva numhowol vivra, osm ora, os ao beswonamoa Sesoana novraoa. ¹⁷Vivm doaramini tombaimonana, indhanariniva mongova andra venatava Sesoamba, himba si plasra avra, wo si sahvavmoa mana vemamba, nonamba velmba besalandramba.

Yeoa Wohhoanavho Vrungao Sesoana Andramoa.

4 ¹Vei, Sesoa, eva Yesus Kristus, hena novra, kava hona moamba yemba vraohv. Yesus Kristus he si helmhola vewol vevav

indhanamba, nomba vei, mendah men avm, eva ten sihavnam. Himba henga si provav homba, wo king kuwulalm wohloholm yunalalm. Wo kava honi men moamba yemba vraohv. ²Wo noinda osva yeoa keknam wohloho, ishomana vinilmoa besalнемelmmoa. Yimba ambo osangas plasra aka vevra elsusva. Osva ovra, himba nomba hellemba owai viv, eva osva ovra, himba nomba hellelm viv. Novnavhora numhowol vevm, heva os taivwonam ambo. Ishunvm indhanamoa, nom hev ten ningvm velm, ishunvm, nonamba himba indkokla vivnamba, wo suwenamandna vewol ovovm hemoa.

³Manara, nambaiva si provav, nonamba indhanamba si aongpup vivra, Sesoana moanonoamba hellemba. Himba si etapewolvra esvema sowotalm gurumba, os heni hena und noinda beswonam lovhoaprinvm, guruva nomba os eishov, manam manam kava hellelm viv. ⁴Himba si wuleihivav, hellemba moanonoamba. Doa himba si vivra osoa, doa wohengivra moangakalamom. ⁵Wo heva os yeoa pevmoa temura vrevm nonam. Nonam nonam kinmba ovra provram, ambo dombongas vevm. Besal nemelmondra vevm. Manimani vevm, nooa Sesoana andranindrini.

⁶Kava kavmba ambo engla wulihawolvna, nihnahonam wuraholmba Sesoamba. Doa nambaiva promnav, kamba murapeta englam wuleihawolalm, vevand velav, pholmangas. Kamba doa murapeta dahalmba vev. Kanamba tovolva si gavav, os ora, Sesoam wainpolna sembayang viniv sengra. ⁷Kava daosna laus vrena besalmba. Kava doa vipiana dandwonamba. Kava keknam wohlohv undnahonamba mendah. ⁸Doa mana vema besal kamba diva kokolma velohmanav. Memba osm, Sesoava kamba si omnavav, yimba lehra indhanarini windel. Sesoa helmholva vewol vev, hengas beswonamba helmhola vewol vev, wo himba si nonam manimani kamba novoa venavav. Himba si kamangasva dombraohvavmoa, no hindnahonam, henoi hem ten und vivm, wo nengviluwuv, hem prolm hengam.

Timoti Yem Pevm.

⁹Yeva nungi lelnam kaindamoa pro. ¹⁰Manara, Demasva mindnam und vevna hona pethamba. Wo himba doa kam bumb velahangana honaminiva Tesalonaikaram. Kresensva gana Galesia provinsram, eva Titusva Dalnesia provinsram gana.

¹¹Memba huiwa kava Lukm mongasalm waiav. Omnarava Makm, waipro, yimba provrava. Himba si kam kolvravav hona kavna andrara men hui. ¹²Tikikusmba kava doa wolaihangana Evesusram. ¹³Kava temba Troasva anamba, kava di moan velahaphona kavna bayu tokolva Karpusna devvra. Wo yimba provrava, nonamba kana moan vilpro hom. Kana veo, tombai dombo, ata ye mai vevav nom tombaim, ten tatatovna vinam, temura ipro.

¹⁴Aleksanda himba manam manam besina vewol vevna, himba kamba mindnam wohindkokla vrena. Sesoa si hembra nengpong vrevav, noindava memba vewol vevpa himba. ¹⁵Eva yeoa ambo novkalana vevm, ata homeis yem eva indkokla vrevm. Hembra mindnam oholvohv, pelekopala vewol ovolmba moamba pinamba.

¹⁶Kava seilmangas Sisa duangna moamba opla vremnana, kavmba dandana vrelmba, mongova kamba okolvranamo. Indkumbiva kamba ambo bumb velaha angana wondakolamsna. Wo kava sembayang venavna Sesoamba, os homeis, yeoa hena indkoklamoa maivethinu, nomba temba himba kamba vinivpa. ¹⁷Wo heva os mendekli kamba waiav. Himba kamba pundind vihana, osm kava osva beswonam ishomana vinvra besalнемelmomba Yutanindna meisungundmba. Mendekliva ninginv Yutanindna meisungundmba, osm hillira heoa evata. Wo noinda osva kava laionna mengmerinimsna nongovhoana. ¹⁸Mendekli si kamba lopslahavav, nonamba indkumbiva kamba sahonamba vinivrava. Mendekliva si kamba beswonam waingavav hevna senakembellam, hev ten vaohotho wulavm. Pioa hena nihilmoa elsus wulovoluvmona velohmanara osangas yunalm.

Eunillam Sehmoa.

¹⁹Kana sehmoa dombtreihunu Prisilaim Akwilaim, eva Onesiporustatanam. ²⁰Erastusva mendah av di Korinda. Wo kava velahaprona uvavulmungil Tropimusva di Miletus kotara.

²¹Wo noinda osva yeva nungi lelnam pro kaindamoa, namvuvinamba tepepenamba dandm posvev yenamba. Vena, Yupulus hev, Putens, Linus, Klotia, wo eva indkumbi Kristusnind, himba yemba sehmoa piambmanav. ²²Mendeklioa yemoa waiavra, wo eva heoa yemoa wavra vewol vevra elsusoa. Doata.